

Atletismoa

EGUNKARIAren aldeko krosa bihar Iruñean

Euskara eta kirola uztartu nahi dira

EUSKALDUNON EGUNKARIAren aldeko lehen herri krosa egingo da bihar Iruñeko kaleetan barrena. Euskara eta kirola lotzea da kros horren helburu nagusia. Ibilbidea erraza da, 7,8 kilometrokoa, eta oraindik izena emateko aukera zabalik dago Atanasio kirol dendan.

Erredakzioa/ Iruñea

EUSKALDUNON EGUNKARIAren aldeko lehen herri krosa egingo da bihar goizeko 11:00etatik aurrera Iruñeko kaleetan. Ibilbidea samurra da, 7,8 kilometrokoa, eta irteera eta helmuga leku berean egongo dira: San Frantzisko plazan.

Oraindik ez baduzue izenik eman gaur baduzue horretarako aukerarik Atanasio kirol dendan. Edo, bestela, igandean bertan irteeran. Izena aurrez emanez gero, 1.000 pezeta (40 libera) ordaindu beharko duzue, eta egun berean emanez gero 1.200 pezeta (45 libera). Helduek, berriz, 600 pezeta (25 libera). Partaide guztiei kamiseta bana oparituko zaie.

Horrez gain, parte-hartzaile guztien artean bi lagunentzako aste osorako bidaia bat zozketa-tuko da Benidormera. Ez galdu aukera, beraz.

Kirol ekitaldi honen xede nagusia euskara eta kirola uztartzea da. Hala, kazeta honek herri krosak antolatuko ditu bost hiribututan: lehena maiatzaren 17an egin zen Donostiako Antigua auzoan. Kros hori jada oso errotuta dago kirolzale eta euskaltzaileen artean. Horren seinale, aurtengo zortzigarren ekitaldian, 700 partaide bildu ziren Antiguan. Bigarren krosa Gasteizen egin zen joan den hilaren 27an. Bihar da hirugarrena Iruñean, eta hurrengo igandean Bilbon egingo da. Azkenekoa, berriz, Baionan urriaren 25ean. Kirola egin nahi duenak, hortaz, ez du aitzakiarik, etxetik gertu korrika egiteko aukerarik izango du eta.

Aipagarria izan da Iruñeko kros honen antolaketan Nafarroako hiriburuko *Beste Iruña* atletismo elkarteak eskainitako laguntza bai ibilbidea prestatzen bai azpiegitura jartzen. X

Golfa

Olazabal liderrarengandik bi kolpera, EEBBetako Irekian

«Ilusio eta konfiantza handiz» dagoela dio

Erredakzioa/ Donostia

JOSE MARI OLAZABAL golf jokalaria hondarribitarrak ondo hasi du EEBBetako Irekia, Payne Stewart liderrarengandik bi kolpera baitago hirugarren postuan. Berarekin berdinduta beste hiru jokalarik daude 68 kolperekin.

Olazabalek Euskal Herrian gaueko 23:00ak zirenean ekin zion ibilbideari. Hondarribikoa ondo baino hobeto hasi zen, lehendabiziko bost zuloetan hiru birdie eginez. Hurrengo zuloetan parean amaitu zuen, baina amaitzeaz zela, 18. zuloan, *bogey* bat egin eta postu bat galdu zuen. Hala ere, gustura agertu zen Olazabal: «Uste dut ibilbide ona egin dudala nahiz eta azken zuloa hutsak hobeto sailkatzea galarazi. Hala ere, baikor nago hurrengo jardunaldiari begira». Hondarribiko jokalariek esan zuen «ilusio eta konfiantza handiz» iritsi zela EEBBetako Irekian. «Espero dut ahalik eta urrunen iristea», gaineratu zuen.

Payne Stewart liderrak, 1991. urteko txapeldunak, 66 kolperekin amaitu zuen Olympic Club zelaiko ibilbidea, lau parearen azpitik. Haren atzetik beste estatu batuar bat, Mark Carnevale, sailkatu zen kolpe bakar batera. Carnavalarena ezustekoa izan zen, jokalarik horrek lehen jardunaldiko kanporaketa lau aldiz baino ez baitu igaro azkeneko 14 ekitaldietan.

Bi faborito nagusiak Tiger Woods estatu batuarra eta Ernie Els hego afrikarra (iazko txapelduna) ez ziren fin ibili, eta *bogey* bikoitz batzuen erruz liderrarengandik 8 eta 9 kolpera amaitu zuten. X

sailkapenak

Lehen jardunaldia

1. Payne Stewart (EEBB)66 kolpe
2. Mark Carnevale (EEBB)67 kolpe
3. Jose Mari Olazabal (EH)68 kolpe
4. Tom Lehman (EEBB)68 kolpe
5. Joe Durant (EEBB)68 kolpe
6. Bob Tway (EEBB)68 kolpe
7. John Daly (EEBB)69 kolpe
8. Jesper Parnevik (SUE)69 kolpe



EGUNKARIAren aldeko Antiguako Krosa oso errotuta dago jada euskaltzaile eta kirolzaileen artean.
EDURNE KOCH

Txapeldunen I. Torneoa

22, gorria, pareta... ... eta pasa

B a b e s l e a

BBV

BANCO BILBAO VIZCAYA

Club
FRONTÓN
906-42 10 00
Joka ezazu gurekin

Ekainak 20 larunbata, 17:30etan. Tele 5n

GOROSTIZA-TABERNA

BERASALUZE VIII-BALERDI

Torneoa

ALUSTIZA-ARRETXE ETXANIZ-CECEAGA

Logroñoko Adarraga pilotalekua



Josefxo Lizartza
Estilistik onena

FRONTÓN

&

TELECINCO

Pilotarik onena

5